
ИМКОНИЯТ, ИСТАК ВА ТАЖРИБАНИ УЙЎУНЛАШТИРАМИЗ.

Партия ташкилотимиз фаолиятида талайгина камчиликлар борлиги Президент Шавкат Мирзиёев билан бўлган видеомулоқотда яққол кўриниб қолди. Биз шу кунгача ҳам фаолият кўрсатар эдик. Лекин, энди тушундикки, самарасиз йиғилишлар, ташкил этиш режалаштирилгани учунгина ўтказилган тадбирлар билан овуниб юрган эканмиз. Аслида партия ғояларини амалга ошириш учун электоратнинг ҳаётий муаммолари моҳиятига чуқурроқ етиб бориш зарур эди. Биз энг кўпсонли сиёсий партия вакилларимиз, деб мақтансакда, мамлакат ижтимоий-сиёсий ҳаётида, фуқаролар онгида мустахкам ўрин эгаллай олмабмиз.

Ҳа, ЎзХДП Фарғона вилоят партия ташкилоти депутатлик гуруҳлари 2017 йилнинг ўзида 48та масалани депутатлик гуруҳида, 5 та масалани доимий комиссияларда муҳокама этди. 6 та масала эса ўрганилиб халқ депутатлари шаҳар, туман кенгашлари сессиялари муҳокамасига киритилди. Жойларга 447 та депутатлик сўрови жўнатилди.

Ҳа, партия ташкилотининг кўчма жамоатчилик қабулхонасига 780та одам ўз муаммолари билан мурожаат қилди ва унинг 81 фоизи бизнинг иштирокимизда ижобий ҳал этилди.

Биз шунга ўхшаш рақамлардан асоссиз равишда таскин топибмиз. Хўш, партия фаоллари, депутатлик гуруҳ аъзолари ўрганган масала юзасидан қабул қилинган қарорлар ижросига яна бир бор қайтдикми? Умуман қарор ижро этилдими? Унга жамоатчилик назорати ўрнатдикми? Мана, қаерда бизнинг “нозик” жойимиз. Ҳа, қанчалар аччиқ бўлмасин, тан олиш лозим, биз аксарият ҳолларда қарор қабул қилиниши билан чекланиб қолдик. Натижада аҳвол сезиларли тарзда ўзгармади, партия ташкилоти, унинг депутатлик гуруҳи аҳоли, авваламбор электоратнинг эътибори, ишончига тўлиқ муяссар бўла олмади. Мана, бир мисол, депутатлик гуруҳларимиз Фарғона, Марғилон, Қувасой шаҳарлари ва Ёзёвон туманида оналар ва болалар ўртасида касалланиш ҳамда ўлим ҳолатини ўрганди. Унинг натижада халқ депутатлари вилоят кенгашининг “Ёшлар сиёсати ва соғлом авлодни тарбиялаш масалалари доимий комиссияси” да муҳокама қилинди. Мавзу долзарб эди. Марғилон шаҳар туғруқ комплексида бемор она-болалар учун умуман жой танқис, 2 кишилиқ хонага 4 кишидан ётқизилар, VELLA, ЭКГ, КЮВЕЗ, СРАР аппаратлари етишмас, ҳатто мавжуд 5 та автоклавнинг 2 таси яроқсиз эди. Туғруқхонанинг “қадим замон” дан қолган “РАФ” ва “Вилис” автомашиналари “тўкилиб” бўлганди. Вилоят перенатал марказида эса 2017 йилнинг биринчи чораги ҳисоботида кўра ўрин-кун режасини чақалоқлар реанимацияси 432,8 фоизга, катталар реанимацияси 218 фоизга бажарган... Ёзёвон тумани туғруқхонасида эса ўтган қиш мавсумида кунига 18 соатдан электр энергияси бўлмаган...

Ўз ХДП вилоят кенгаши депутатлик гуруҳи киритган масала доимий комиссияда кўрилди, тегишли қарор қабул қилинди. Аммо аҳвол ўзгардими, шундан кейин? Биз бу масалада депутатлик назорати, жамоатчилик назоратини бир кун ҳам тўхтатмаслигимиз лозим эди. Партиянинг оммавийлиги ва обрўси унинг амалий ишлари билан баҳоланади.

Биз ана шу ҳақиқатга етарлича эътибор бермадик. Президент қўяётган талаб, таҳлил ва ҳулосалар шунинг учун ҳам ҳақли, долзарб ҳамда ижроси мажбурийдир.

Яна бир муҳим жихат. Биз партия депутатлик гуруҳи билан партиянинг парламентдаги фракцияси ўртасида узвий амалий муносабатларни шакиллантира олмадик. Фракция иштирокида яратилаётган қонун лойиҳалари дастлаб қуйида, БПТ, шаҳар-туман партия ташкилоти ва депутатлик гуруҳларида ҳар доим ҳам муҳокамадан ўтказилмади, таклифлар ва мулоҳазалар олинмади.

Мен биринчи бор вилоят кенгашига депутат бўлиб сайландим. Лекин халигача вилоят ҳаётига доир масала, ҳатто бюджет муҳокамасида ҳам биз партиямиз дастури ва ғоялари нуқтаи назаридан муқобил қарор лойиҳасини тайёрлаб сессияда таклиф қилмадик, бирон сиёсий партия депутатлик гуруҳи билан баҳс мунозарага киришмадик. Бу вазиятда ҳам ижро ҳокимияти таклифини қувватлаб келавердик. Шундан бизни, сиёсий партия вилоят кенгашларини, унинг раҳбар ва депутатларини кенг халқ оммаси яхши таниб билмайди. Шу маънода ҳам Президентимизнинг “Миллий парламентимиз ҳақиқий демократия мактабига айланиши керак” деган хитоблари ғоят муҳим ва ўринлидир.

Ҳозир вилоят партия ташкилоти 40 мингга яқин аъзони бирлаштирган. Лекин партия бош наشري “Ўзбекистон овози” обуначилари атиги 2,5 мингтани ташкил этади. Биз ОАВ лари имконидан

кенгроқ фойдаланиш масаласини хам қайта кўриб чиқамиз. Партиядан сайланган депутатларнинг телевидениеда чиқишларини ташкил этиш билан уларни халққа янада яқинроқ таништириш лозимлигини уқдик. Албатта улар орасида фаол, амалий натижалар кўрсатаётган, сайловчилар хурматига сазовор депутатлар бор. Эндиги вазифа улар сафини кенгайтириш, партия обўси-депутат обрўси деган ғояни ҳаётга тадбиқ этишдир.

Президент депутатлар, партия фаоллари олдидаги жуда кўплаб бирламчи вазифаларни аниқ равшан белгилаб берди. Энди замон билан ҳамнафас бўлиб ишлаш ёки ўрнимизни ишлайдиган одамга бўшатиб бериш талаб этилади. Бизга партия фаолиятини қайта кўриб чиқиш ва чин маънода халқ қўллаб қувватлайдиган сиёсий кучга айланиш учун имконият, истак ва тажриба хам бор.

2017-07-17 12:07:06